

Nkombo monene ya Nkolo na biso YESU KRISTO epambolama.

Bandeko balingami, boya tóyekola Liloba ya Nzambe lelo, wana tozali kokoba na mokanda ya Danieli. Lokola Biblia elobi na 2 Timote 3:16 (Mokanda na Bomoi):

“Makomi nyonso epesami na Nzambe mpe ezali na tina mpo na koteya, mpo na kopamela mabunga, mpo na kosembola, mpe mpo na kolakisa moto nzela ya bosembo, mpo ete moto ya Nzambe akóma ya kokoka, abongisama mpo na mosala nyonso malamumu.”

Yango wana makambo nyonso oyo totángaka na Biblia ezalaka na mateya ya kolendisa biso mpo tótambola malamumu na mobembo na biso awa na mokili, kozanga kokwea na mimekano ya Satana. Mpo Makomi elobi lisusu:

“Makambo wana nyonso ekómelaki bango lokola ndakisa, mpe ekomamaki mpo na kokebisa biso oyo tozali na mikolo ya suka.”

— 1 Bakorinti 10:11 (Mokanda na Bomoi)

Yango elingi koloba ete makambo oyo basantu ya kala bakutanaki na yango ezali mpo na kolakisa biso ndenge ya koleka tango mimekano ekoya.

Danieli kati na komekama makasi

Na mokapo oyo ya motoba, tomoni Danieli — atako azalaki moto ya bosembo mpe ya kokoka — akoti na komekama makasi.
Tótanga lisolo yango:

Danieli 6:1-18 (Mokanda na Bomoi)

1 Mokonzi Dariusi aponaki bakambi nkama moko na ntuku mibale mpo bátambwisa bokonzi mobimba.

2 Atiaki bakonzi misato likolo na bango, mpe Danieli azalaki moko kati na bango, mpo bakambi bápesa bango sango mpe mokonzi azwa mabe te.

3 Danieli alekaki bakonzi mpe bakambi nyonso mpo molimo malamumu ezalaki kati na ye; mpe mokonzi akanisaki kotia ye mokonzi ya bokonzi mobimba.

4 Bakonzi mpe bakambi balukaki likambo ya kofunda Danieli, kasi bakokaki komona mabe ata moko te, mpo azalaki sembo mpe azalaki na mbeba te.

5 Balobaki: *“Tokozwa likambo ya kofunda Danieli kaka soki tozwi yango na mibeko ya Nzambe na ye.”*

6-9 Bongo bakendeki epai ya mokonzi mpe basengaki ete abimisa mobeko: moto nyonso oyo akobondela nzambe mosusu to moto mosusu na mikolo tatu misato, longola kaka mokonzi, abwakama na libulu ya nkosi. Mokonzi atiaki elembo na mobeko yango.

10 Tango Danieli ayokaki ete mobeko etiamaki, akotaki na ndako na ye, afungolaki maninisa epai ya Yerusalemi, mpe abondelaki Nzambe mbala misato na mikolo lokola momesano na ye.

11-13 Bato wana bakangaki ye wana azalaki kobondela mpe bafundaki ye epai ya mokonzi.

14 Mokonzi asilikaki mpe alukaki ndenge ya kobikisa Danieli kino pokwa.

15 Kasi bato bakundwelaki mokonzi ete mobeko ya Bamedi mpe Bapersi ebongwanaka te.

16 Bongo Danieli abwakamaki na libulu ya nkosi. Mokonzi alobaki: *“Nzambe na yo oyo ozali kosalela ntango nyonso akobikisa yo.”*

17 Batyaki libanga mpe batiaki bilembo mpo moto abongola likambo te.

18 Mokonzi azongaki na ndako na ye, alekisaki butu na kolela mpe alalaki te.

Mateya oyo tozwi

Danieli asalelaki mosala ya bokonzi na bosembo nyonso. Azalaki moyibi te, azalaki kolya kanyaka te, mpe azalaki kosalela mosolo ya bokonzi malamumu. Yango wana mokonzi atyelaki ye motema.

Kasi baninga na ye bazalaki na lokoso, na kanyaka mpe na moyibi. Danieli akómaki epekiseli mpo na bango. Pole mpe molili ekoki kosangana te; yango wana babandaki koyina ye mpe kosalela ye mabongisi mabe.

Satana amonaki ete Danieli akoki kotika bosembo te, bongo abongolaki mayele mpe abundaki bondimi na ye. Kuna nde bitumba ya solo ebandaka — tango moto asengeli kopona EE to TE mpo na bondimi na ye.

Lokola elobami:

“Tokozwa likambo ya kofunda Danieli kaka na mibeko ya Nzambe na ye.”

— *Danieli 6:5*

Bakambi basalaki mobeko mpo kaka koboma moto moko. Kasi Danieli atikaki kobondela te; afungolaki maninisa epai ya Yerusalemi mpe akobaki kobondela mbala misato na mokolo. Aponaki kokufa mpo na bondimi na ye — mpe Nzambe abikisaki ye.

Ndakisa mpo na bomoi na biso

Makambo oyo ekómelaki Danieli ekoki mpe kokómela biso:

- Okoki kozala sembo na mosala, kasi bakotinda yo osala kanyaka. Kanisa Danieli.
- Okoki kozala na bomoi ya bopeto, kasi mibeko ekoki kotinda yo osala lisumu mpo obatela mosala.
- Mokonzi to molakisi akoki kobangisa yo mpo osala pite; kanisa — kimá lisumu!
- Libota ekoki kopekisa yo kobondela to kotánga Liloba ya Nzambe. Kobanga te; ezali kaka eleko ya mwa ntango.

Kanisa mpe , , , , mpe . Bango nyonso bakutanaki na mibeko ya makasi mpo na komeka bondimi na bango, kasi nsuka na bango ezalaki ya elikya mpe ya lokumu.

YESU akebisaki liboso

“Nalobi makambo oyo mpo bókwea te... bakobengana bino na masinagoga; mpe moto oyo akoboma bino akokanisa ete azali kosalela Nzambe.”

— *Yoane 16:1-4 (Mokanda na Bomoi)*

Biblia elobi lisusu:

“Bapesi bino ngolu, kaka te mpo na kondima Kristo, kasi mpe mpo na koyoka mpasi mpo na ye.”

— *Bafilipi 1:29*

“Bato nyonso oyo balingi kozala na bomoi ya Nzambe kati na Kristo Yesu bakonyokwama.”

— *2 Timote 3:12*

Makambo ya mikolo ya suka

Na mikolo ya mpasi monene, mokristo-mabe akobimisa mobeko moko mpo na bondimi: osambela ekeko mpe ozwa elembo na ye to obomama. Makambo ya kala ezali elili ya oyo ezali koya.

“Makambo wana ekomamaki mpo na kokebisa biso.”
— *1 Bakorinti 10:11*

Yango wana lelo ezali tango ya kobongisa bomoi na biso, kozwa Molimo Mosantu mpe kozala pene mpo Nkolo aya kozwa Lingomba na Ye.

Elaka ya Nkolo

“Lokola obatelaki liloba ya mpiko na ngai, ngai mpe nakobatela yo na ngonga ya komekama oyo ekoya na mokili mobimba... Nazali koya noki; simbá makasi oyo ozali na yango mpo moto azwa motole na yo te.”

— *Emoniseli 3:10-11 (Mokanda na Bomoi)*

Soki naino obongoli motema te, ndeko, sala yango lelo wana tango ezali naino.

Nzambe apambola yo.

Share on:
WhatsApp